

皇清經解續編

皇清經解彙編

皇清經解續編卷三百十

南菁書院

虞氏易言一

武進張惠言

上經

屯

屯元亨利貞勿用有攸往利建侯
大哉屯乎始萬物者也有
亨道焉有利道焉有貞道焉有四德而未施故曰屯君子以
己正人不以己應人非其貞而利者君子勿往也動已而天
下應焉日可見之行也故曰利建侯

初九盤桓利居貞利見侯
君子創業垂統非俟時也居其室
行其言天下歸正焉而況于侯乎

六二屯如遭如乘馬班如匪寇婚媾女子貞不字十年乃字

福雖大豫之悖禍雖遠基之亂先其所難不可以有成卽其所敗不可以有親婚媾者近而正者也非其人勿與女子之貞也

六三卽鹿无虞惟入于林中君子幾不如舍往吝 鹿者禽之所取也林中者禽之所養也非所取而取則人不與也非所與而與則民不載也君子養民而已矣

六四乘馬班如求婚媾往吉无不利 馬也者君子之乘也婚媾者小人之求也小人而求君子之福非小人之利也往旣吉矣何不利之有

九五屯其膏小貞吉大貞凶 天下之難也則膏澤不降而施不遠也苟懷邇者而已臣之作福而弗能禦也故凶屯乎屯

非聖人奚其濟

上六乘馬班如泣血漣如 利閭世以苟其位乘主以棄其輔
未有不躓者矣君子之所舍也故泣血漣如言不可久也

蒙

蒙亨匪我求童蒙童蒙求我初筮告再三瀆瀆則不告利貞
時哉蒙乎亨而後有正者也不憤不啟不悛不發舉一隅不
以三隅反不告循循乎至于聖也而不知其然是以利貞
初六發蒙利用刑人用說桎梏以往吝 先覺覺後覺賢覺於
聖衆覺於賢初發矣聖之所用也刑也者法也蒙者人之桎
梏也正法以說之所以發天下也來學禮也往教非禮也

九二包蒙吉納婦吉子克家 櫟括不棄曲木規矩不辭畸材

束脩以上君子之所誨也師也者以道覺人者也夫也者以智帥人者也父也者以矩正人者也夫夫而婦婦父父而子子正身而後正人之謂也

六三勿用取女見金夫不有躬无攸利 邪說必害正淫女必亂男非其道而求之也必有利焉者不失其身者寡矣君子不以身比不順

六四困蒙吝 君子近有德親有道見道德而弗說者蒙之至也以是爲困也故吝

六五童蒙吉 貴以謀莫之尤也賢以問莫之應也養以正者其童蒙乎語取善者也惟善取善是謂有善善在其中矣

上六擊蒙不利爲寇利禦寇 養正者漸之閑衰者防之防之

非正也順也順猶乎正余不屑之教誨也者是亦教誨之而已也不使非正疑正

需

需有孚光亨貞吉利涉大川 養德者信而已矣養威者令聞而已矣有孚於內也光亨於外也正而吉矣飲食宴樂需時也涉大川需事也惟利涉大川者可以飲食宴樂

初九需于郊利用恆无咎 初在野矣而需于郊非不能也人不信也待其有孚故利用恆无咎

九二需于沙小有言終吉 夫涉川者濟于沙二在澤也而小有言非沙之過也夫沙足以衍澤矣而涉川者小有言非沙之過與需澤者需其衍也故終吉

九三需于泥致戎至 三在沙矣而需者在泥自沙而抃泥雖
戎未有不至者也夫戎之至可樂也而亦可危也惟敬慎者
知之

六四需于血出自穴 血者陰陽之凝也龍蛇戰蟄蟲藏血而
出矣孚之光也

九五需于酒食貞吉 涉大川者非五之所有事也以是爲正
而已矣夫何需酒食而已矣

上六入于穴有不速之客三人來敬之終吉 王者存三統二
爲公一爲恪王所客也敢不敬與夫坤臣也乾君也臣而君
者有三人焉雖不當位未大失也三統之謂也

訟有孚窒惕中吉終凶利見大人不利涉大川 訟之孚也以
窒亂也猶有惕焉其吉也以中也君子以始謀爲不詳矣而
況于終之乎夫大人者正己而已矣故用人之孚去其諒用
人之惕去其懼用人之中去其平涉大川者從險而求亨者
也故凶

初六不永所事小有言終吉 以惡爲惡者其惡不可改也以
善爲惡者非有其惡也辨之不辨也已矣其爲事也不永不
煩言而辨明小人之吉也

九二不克訟歸而逋其邑人三百戶无眚 天地戰乾道藏衰
正訟君子否雖窒而孚其猶逋乎以正治不正猶有爭焉以
爭召正无爭耳邑雖小正之始也眚也者敗之自內者也

六三食舊德貞厲終吉或從王事无成 山高而不崩維木喬
焉國故而不陵維賢世焉亂國者必去其故家危而正大人
爲之也故終吉以正從君而有終者吾聞之矣以不正從君
而成其事者吾未之聞也

九四不克訟復卽命渝安貞吉 訟之時危矣哉中且不克況
不中乎大人新命之時也旣渝旣安何失之有

九五訟元吉 訟之始讒疑聖訟之成君安佞大人訟君子貞
遯魚孚維德元吉之終也

上九或錫之鞶帶終朝三褫之 蹠人之勢而載其位貪人之
功而享其利與事不克而受賞者曰君子也恥乎錫之權也
褫之正也或之者甚之也

師

師貞大人吉无咎

師之所貞者大人也王正大人大人正師

師凶道也大人在師吉未可知也將帥之士爲諸侯師然後吉矣吉然後无咎慎之至也

初六師出以律否臧凶

律者法也古者有司馬法師出于賦

則邱甸法師出于國則井通法師出于野則治兵振旅法師出于天下則九伐同邦國法否臧者失律也律非一日而失所由來漸也君子謂之律竭也故凶

九二在師中吉无咎王三錫命

臣專眾非正也在師中不可

以不專也故吉无咎王也者正天下者也錫命所以正大人也

六三師或輿尸凶 師有善勝無善敗以人之生僥利者君子弗忍也師或輿尸大人罪也

六四師左次无咎 師有常備无常勝左次未勝也而不可以有敗雖未吉也何咎之有

六五田有禽利執言无咎長子帥師弟子輿尸貞凶 禽將于師執訊于國禽將于師軍之力也執訊于國君之成也師中吉則王无咎矣帥師者以制命也弟子未能用命也師有二命輿尸道也後乃貞之庸有多乎大君之過也

上六大君有命開國承家小人勿用 能賞罰之謂大君大君者正命者也天子之大夫有功出封加一等禮也取于天子之地以與諸侯義也師者校功而賞之其有功不以小人而

後其賞也曰勿用而已矣

比

比吉原筮元永貞无咎不甯方來後夫凶 比之吉也正在上也正在上者其下未有正焉者也正在上而天下正矣河出圖洛出書所以命也申之所以告也原筮矣而始貞何咎之有比者未有甯也不甯甯矣王者正天下來而與之无所擇也之謂方後夫然誅之不足與有正也

初六有孚比之无咎有孚盈缶終來有宅吉

傳曰王者有不

臣二王之後則不臣也師則不臣也中國之外則不臣也初者正之元而非比所及也比之先而來之終也視王者之孚爾矣缶也者君之尊也明澤之及下也有孚而比之矣有孚

盈缶而來矣有宅吉者其諸其不臣與

六二比之自內貞吉 親親正也

六三比之匪人 比時也匪人存乎爾奚不凶來者也奚其凶

六四外比之貞吉 尊賢正也

九五顯比王用三敵失前禽邑人不戒吉 比之方來未顯也

元永貞而後顯矣三敵者敵之而有正者也其无正不敵之

矣前禽正矣失焉可也王者之化自其邑始傳曰其君子實

元黃于篚以迎其君子小人簞食壺漿以迎其小人豈戒也

哉

上六比之无首凶 傳曰後時者殺無赦王者所不受也非惡

其後惡其无始也

小畜

小畜亨密雲不雨自我西郊 畜民者以小致鉅有施也然後
畜焉不可以不亨也雨也者天之所以畜物也雲也者天之
所以畜雨也雲小而雨天下其文王之政乎傷不亨也
初九復自道何其咎吉 君子撥亂世反之正不欲速不見小
利復之乎道而已一朝之治咎在百世未有道而咎者也故
吉

九二牽復吉 道者君子與百姓共者也德者復于道而有焉
者也臬正而知袞繩正而識枉聖人覩而民性定矣牽復者
語善民也

九三車說腹夫妻反目 車說腹所載匱也夫妻反目所處頽

也言未成乎畜也君子之畜民也莫先于正其家正其家莫先于正夫婦不得其生而正焉者无之車說腹夫妻反目不以罪三也

六四有孚血去惕出无咎 更亂之民易富也憂傷之俗易治也反其孚而已矣信以生則勤信以聽則順血者創于外者也惕者瘕于中者也血去而惕出矣何咎之有語以其民畜者也

九五有孚攣如富以其鄰 上好正則民信上好義則民任上好讓則民卹有孚攣如富以其鄰禮之始也

上九既雨既處尙得載婦貞厲月幾望君子征凶 兩者澤之

遂也處者有其室也得者車之實也貞者夫婦際也然而危

何也小人約斯濫富斯驕勞斯生逸斯窳非禮而以甯者否
矣月盈則闕志盈則失畜也者言乎其小也月幾望矣而君
子遂之也則凶而已矣疑也者似而非者也志不篤也漢之
文景唐之太宗其疑矣乎

履

履虎尾不啗人亨 有一言而可以治天下者其禮乎禮不虛
作有履焉爾聖人履天民履君小人履君子君子身可危也
禮不可回也虎尾猶履之而況其安者乎喪禮而敗者吾聞
之矣敗以禮者吾未之聞也履虎尾不啗人而況其安者乎
志定故也亨道也不言利貞大矣哉

初九素履往无咎 甘受和白受采忠信之人可以學禮之人